

**GONÇALO NEVES**

**ITERE**



**Editerio Sudo  
2019**

**Gonçalo Neves**

**I T E R E**

**Kolekturo de 18 original Ido-poemi senpretenda  
(qui povus esar mem plu mala), kun prefaco da  
Nuno Lemos**

**Editerio Sudo**



**Espinho, Portugal**

**junio 2020**

Itere

Autoro: Gonçalo Neves

Espinho, Portugal

Todos os direitos reservados / Omna yuri rezervita

Verko en Ido (Idolinguo, Linguo Internaciona di la Delegitaro)

© Editerio Sudo — Gonçalo Neves

editerio.sudo@gmail.com

Revizita da Partaka

Imajo sur la kovrilo: Pixabay.com

Imajo sur la dopa kovrilo: *Ship of fools* (“Navo di foli”, 2018), dijitala imajo da © Maggie Taylor (n. 1961), Usana artistino qua per dijitala teknologio kreas, segun sua propra vorti, “revo-mondi habitata da omna-dia objekti”.

## TABELO DI KONTENAOJO

PREFACO.....	4
Ido .....	7
Linguo blua .....	8
Bel idiom.....	11
Andreas Juste .....	13
A Couturat.....	14
Itere .....	16
Odo ad absenta spozino.....	18
Venez! .....	21
Kune.....	22
Grizesko .....	23
Pastoralo mea .....	25
Foresto.....	27
Lum-efekti.....	29
Bagatelo .....	30
Vakua hori.....	31
Dum ke flatuis me .....	32
Rimi di naturo .....	34
La viruso .....	35

## PREFACO

Gonçalo Neves komencis poemifar en Ido en 1999. Til 2002 il publisis plura poemi en *Progreso* ed *Idolisto*. En 2002 aparis lua poemaro *Dazlo*, en qua il kompilis omna sua Ido-poemi tillore aparinta. Ta libro, kontenanta 13 poemi, rieditesis en 2017 e 2019.

En ica nova kolekturo, ja anuncita en ped-noto dil triesma edituro di *Dazlo*, Neves insertis omna poemi quin il skriptis de pos 2002. Kin de ca 18 poemi (*Bel idiomo*, *Odo ad absenta spozino*, *Pastoralo mea*, *Dum ke flatuis me* e *La viruso*) ja publisesis en *Idolisto* od en la jurnalero *Posta Mundi*, ma le cetera aparas hike unesma-foye.

Neves explikis a me quale il ordinare (quankam ne sempre) skriptas sua poemi. Il havas mikra kayero (formato A5) kun harda kovrilo verda (quan il mencionas en sua poemo *Linguo blua*), en qua il skribas la versi per nigra-inka bul-skribilo. Il montris a me la kayereto, quan me foliumis: il ofte emendas e forstrekizas vorti o mem tota versi, e do kelka pagini aspektas vera pelmelo, kun parti di sequanta poemo mixita a parti dil antea. Erste pose, kande il supozas havar la “definitiva” versiono, il komencas tipo-skribar ol per

komputero. Tamen me komparis kelka poemi tipo-skribita al fonta versioni manu-skribita e remarkis kelka mikra diferi...

En ica poemaro, kompare al antea, Neves parolas min ofte pri amoro e plu ofte pri la linguo ipsa, quan il laudas e prikantas quale amoreskinto. Ica relato di poeto a la linguo quan lu uzas por poemifar semblas a me esar kelke stranja od, adminine, neordinara. Il himnifas pri Ido kun astoniva exalteso e kompreningas ke ica linguo es nekareebla en ilua poezial produktado, ke sen lu ilua cerebro funcionus altre. En ica poemi il sempre uzas la pronomo *lu* (nultempe *ol...*) por parolar pri Ido, ed en kelka okazioni il mem adparolas la linguo direte, evidente rekursante al pronomo *tu*, por krear plu intima atmosfero.

Ja antee, en sua Esperanto-poemaro *Simptomoj* (1999), aparinta du yari pos ke il unesma-foye lernis Ido, Neves poemifabis pri lingui, pri lia importo kom vehili di sentimenti e pri lia interdiferi. Exemple, en la longa poemo *Amoroj* (“Sexuagi”), il atribuas sexui a diversa lingui (la Latina, Portugalana, Kataluna, Angla, Esperanto ed Ido kom femina, e la Hispana, Italiana e Franca kom maskula) e hipotezifas ke Ido naskis de sexuago inter la Franca (“la maxim galanta, flatera e mielatra” linguo) ed Esperanto. En altra poemo, *Lingvoj kaj naturo* (“Lingui e naturo”), il dicas ke Interlingua “es salado kun kelka ordino”, kontre ke Ido “es ordino kun kelka salado”,

Esperanto es “l’ordino absoluta kun aroma di naturo” e Volapük es “l’ordino absoluta kun aroma di alkoholo”. Fine, en triesma poemo, *Konditorskaja* (Rusa vorto signifikanta “sukrajerio”), il mem prizentas tota verso en Volapük (*Menade bal speli bal*, “Ad un homaro, un espero”) e tri-vorta verso makaronika, en Ido, Volapük ed Esperanto: *Internaciona pük cioma* (“Internaciona linguo total”)...

Forsan ne es hazardala ke ica poemaro aparas precize en la nuna tempo di globala foleso, kande la homaro semblas esar itere pronta por dementerio.<sup>1</sup> Ka poezio ipsa ne es speco di foleso? Forsan yes. Tamen semblas a me ke parolesas pri foleso ulmaniere salutara...

Nuno Lemos

---

<sup>1</sup> Ja en 1934 (*Progreso* 100, p. 2) on povas lektar ica vorti dal “redakterio” (do, probable da Alphonse Matejka ipsa, lora chefredaktero): “quon ni povas demandar de generaciono qua — ni konfesez lo en tota sincereso — es matura por dementerio?”...

## **Ido**

Ideo por unu,  
deo por altru,  
idolo por ica  
dolo por ita.

Nur un litero distingas  
lo distinta  
de lo instinta.

En amiko sidas amo,  
en amoro lojas moro,  
en poemo,  
mem sen temo,  
jacas emo.

## **Linguo blua**

Verda kovrilo...

Ne importas:

mea kordio pensas blue,  
e mea mento fluas senlimite.

Nur la linguo  
qua donos a me bele  
lo bel e pura di pensi  
laxa e friskanta,  
nur ta linguo,  
nur tala linguo,  
nur lu,  
(magial sonato),  
nur lu fitos,  
nur lu konvenos,  
nur lu povos  
expresar omna nuanci  
e singla detalo  
di mea ammo.

Ho, kara linguo desprizata,  
me komprendas la pulsado  
di tua vorti harmonioza.

Me sentas tu  
kom intima kompano.

Mea cerebro prizas tua normi,  
e mea kordio sentas tua vibri.

Kun tu e per tu  
me povos morge e sempre  
expresar la tot ampleso  
di mea mondo semble mikra.

Tu helpas me kreskar,  
e me helpas tu vivar.

De tombi apene konocata  
sonas matida voci di pioniri.  
Me savas askoltar oli.  
Me povas komprender li.

Rigoroza, exakta, ma samtempe  
sat laxa por kreado,  
yen perfekta kombinuro  
flegenda omna-instante.

Tu duros,  
e me duros kun tu  
e pro tu.

## **Bel idiomو**

Bel idiomو blua,  
nur tu fitas  
en mea cerebro labirinta,  
nur a tu me rekursez  
por expresar lo intima  
di mea maxim rafinita pensi.

Dum ke la stomakon  
skrapas digesti sturmoza,  
che tu me serchas refujeyo,  
per tu me komunikos al mondo  
l'unikeso di mea anmo,  
lo distingiva di mea eso.

Pro quo me duras marchar  
sur treko sinuifanta?  
Pro quo me vidas adversi  
an singla angulo dil voyo?  
Ka me vidas o nur imaginas?  
Ka me savos dicar lo dicenda?

Tanta rebusi en la kapo!  
Ka tandem me trovos busolo  
e videskos la faro vartanta?

Dume tu, idiomo sonor e miniona,  
eskartez tua ali,  
extensez tua kapo,  
vokez e lurez,  
montrez tu a ni, ad omni,  
ne celez tu dop la velo  
di glorio pasinta  
o di ecelo laudata.

Esez kun la mondo e por la mondo,  
expresez lo moderna moderne,  
helpez erudit ed ordinari  
por interkompreno maxim dezirinda  
en nia epoko tante trublata!

## **Andreas Juste**

Tua versi tililas oreli mea  
e, dum titilar, li pensigas  
pri nia fiereso esar Idisti.

On kantis olim pri la morto  
dil lasta poeto nialingua,  
ma tal dio ne ja venis,  
e nultempe on vidos tal kozo.

Sempre sonos l'idiomo sonor,  
bel e pur qual aquo limpida.

Lu sempre atraktos nova bardi,  
qui trovos en lu plezuro senfina,  
e tu, kar Andreas, vivos kun lu  
por sempre, kun tua monumenti papera.

## A Couturat

Pro quo tal violento  
raptis de ni e del mondo  
tua mento lucida?

Filozofo, tu vizis ordino,  
diciplino mental,  
rafinita raciono  
inter la sovaja kustumi  
dil expresado homal.

Ho, filio di lumo!  
Tu parpensis, tu meditis,  
tu konstruktis frambo maxim solida  
ed ofris omna frukti  
di fekund intelekto  
por progreso,  
ne nur titule, ma reale,  
por ecelo omna-felda.

Tua ardua esforci ne perdesis:  
ni heredis la tota verko  
e sorgas lu, flegas lu.

Tua spirito permanas e fluktus,  
dum ke ni, nura gasti,  
exploras vorti, aspiras erudeso  
e revas pri dio futura,  
kande la mondo erektos  
la monumento quan meritas  
tua verko nemortiva.

## **Itere**

Me renkontris tu itere.

Ni bone interkonocas,  
tu e me,  
me e tu.

Nia relato es specal ed unika:  
ni quaze interkonocas de eterna tempo,  
de altra sezoni apene sentebla.

Tu savas lo  
e tu joyas savar lo:  
nultempe tu cesis habitar  
la maxim mikra anguli  
di mea kordio spacoza.

Nia uniono mental  
permanos e persistos  
malgre interrupti,  
malgre heziti.

Sen tu  
mea cerebro functionus altre,  
e mea fingri indijus  
la dolca susuro di tua vorti.

Kara linguo blue bela:  
ne cesez sonar  
en nia mondo bunta,  
hastoza,  
indiferenta,  
blazita...

## **Odo ad absenta spozino**

Tu mankas a me  
en ca domo solitara.

Nia spegulo reflektas  
omna nuanci di nia vivo  
komuna,  
ek epizodi mikra,  
nur nia,  
netransmisebla,  
nekomunikebla,  
sentebla nur  
en lo intima  
di nia duo.

Lo tua  
e lo mea  
en ofta konkordo  
di amoro sempra.

Kande me accensas  
l'eskalero di nia hemo,  
me audas tua pazi  
en mea mento sospiranta.

Nur tu povas  
plenigar la lakuni  
di mea ento friskema,  
sempre serchanta lo nova,  
chanjema, nesekura,  
aspiranta metodi habila  
cis e trans lo posibla.

Nur tu povas sustenar  
tanta tendenci,  
tanta deviaci.

Nur tu  
povas amorar me  
sen irga dominaco.

Nur tu respektos  
lo singulara  
di mea komplikeso.

Nur tu  
e me  
interamoros tale  
sen irga limito  
en nia mondo unika.

Karino,  
ni durez l'aventuro  
e partoprenez lo sekreta  
di nia certeso.

**Venez!**

Venez!

Ni esez libera kune  
malgre omna obstakli.

Ni vivez komplete  
dum oglar vers lo nuna  
sen obliviar lo lora.

Venez!

Ne es tarda,  
ni iros sen kateni  
kun kordio lax ed ajil.

La mondo es nia,  
sen limiti,  
sen impedi,  
tu e me,  
nun e sempre.

## **Kune**

Vadinte en fango sordida,  
ni savas ke ni vinkos.

Ni konocas l'enemiki  
di nia komun feliceso  
e ni evitos, ni eludos,  
ni eskartos irga stroki  
e duros pazar e kurar  
kune  
vers nia liberesko final,  
definitiva,  
neretrovokablela.

Lore,  
nur lore,  
tu e me  
divenos unu.

## **Grizesko**

Ka tu ne sentas lo?  
Nia relato koldeskis  
sen ke tu o me  
perceptis simptomo o motivo.

Proximeskas la mez-evo  
quan me sempre tante timis  
e quan tu neglijis, forsan juste.

Mea nevralgio duopla  
di ciatika nervo til nun robusta  
amorcis la cirkuito  
di splino nun kreskanta.

Yes, me enoyas la vivo  
transitive ed objektale.

Ka forsan me ja vivis lo vivinda,  
e nun nulo altra restas  
kam iterar pasinta ceni?

Tamen tu,  
sempe plena de energio,  
entuziasmo,  
impetuo,  
optimismo,  
cerne tu,  
entraprezema,  
sempe friskanta,  
kuracos e risanigos me,  
e tale tu ipsa  
grabos ne-efaceble  
salianta literi di nov etapo.

## **Pastoralo mea**

Ca-nokte me konjektas ke existas  
altra kolorito lor la Kristnaski  
kun rentiri e buraski nivoza.

Me adpazas vetrino sur la strado  
e haltas ibe, muta, vertikal,  
dum ke la dorso examenas hasti  
e frenezii cis la neta vitro.

Transvitre me serchas la prima nasko  
(Esperi lore lojis en la stablo  
obskur, an kripo sur litiero!)  
ma trovas nur groteska fardo bunta,  
peruki, maskili e krizokalko.

Cintilifanta kripi oripela  
ca-nokte ofras lauta bonimento.  
De ibe karakolas la barbozi  
en reda boneto velura, gaye,

kun saki bufanta, plena de trompi,  
reklami mentiera, fals idoli,  
e gestas al turbo stras-avida.

Ca-nokte me perceptas la vigilo  
da enti suspendata qui expektas  
retroveno di lo prime naiva.  
  
Ne sonas brami di asni e bovi;  
korpuskuli torporanta vartas nun,  
super neon-ampuli dazlanta,  
til ke venos mesiatri habila  
en nov uniformi ed itere  
anuncos lo kredenda da ni omna...

## **Foresto**

En foresto,  
nur en foresto,  
inter arbori tace komplika,  
on sentas libereso plena.

Nur en foresto  
suno ed ombro interludas konkorde.

Ibe gorgeas habitanti fidela  
inter percho e flugesko itera:  
aliziti simbola  
qui establisas frontiero  
inter cielo e tero,  
juante lo bona di amba mondi.

Nur ganinte lia fido,  
on vere povas  
sejornar en foresto sen impedo.

Nur perceptinte lo saja di lia bibili,  
on povas komprenar  
l'intima gramatiko di naturo.

Pro to me ne volas livar  
ca refujeyo tante aceptema;  
pro to me itere divenas novico  
e me lernos l'etern alfabeto  
sen prezunto di civilizito,  
e tale me avancos e progresos  
pos abasir me til la nivelo  
di kreiti sen busolo,  
ma sempre certa pri la voyo  
sequenda e sequata.

## **Lum-efekti**

L'ombro kontenas  
Omna nuanci di koloro.  
Nur persevero tra l'ombro sucesos  
Sizar la tota gamo di lo sekreta.

Ombro, kompano di silenco,  
Donez a me tua obskura lumo  
Por eskartar la dazlo  
Da moderna teoremi.

## **Bagatelo**

Meditar, lektar e skriptar  
suficas por vivo felica.

Por to me tamen bezonas  
silenco e tempo libera.

Ma vicinal muziko bruisa  
od aboyo di hundo sur korto,  
rekorto-mashin' rotolanta  
sur vasta gazono cirkuma  
impedas reflekti e kreo,  
cerebron inkombras per gango,  
qua stuntas jermifo di versi...

## **Vakua hori**

Feminal versi  
papilionagas ca-nokte  
inter cirkonvolucioni  
di linguo cerebral.

Nedormiveso tua  
metos ali di fantazio  
ed igos tu explorar  
la profund radiki  
di tua senpoveso.

Venez! Akompanez me  
dum marchar vers la solvo  
ed abuteyo di omno...

## **Dum ke flatuis me**

Dum ke flatuis me,  
sentis me inspiro  
ed interna suflo  
en cerebro mea.

Dum ke flatuis me,  
en la kapo naskis  
la rebel deziro  
krear nov idiom.

Dum ke flatuis me,  
me kun hasto kuris  
vers fetid latrino  
por intern alejo.

Dum ke flatuis me,  
me kun blazo sidis  
sur la vazo blanka  
e la verko kreis.

Dum ke flatuis me,  
e l'anuson livis  
singla brun sociso,  
nova vorto naskis.

Dum ke flatuis me,  
me jargono forjis,  
quan me quik judikis  
kom idiomu pronta.

Dum ke flatuis me,  
me la ego nutris  
e prolongis vane  
la Babel-turmego...

## Rimi di naturo

Ucelo flugas en kalm cielo,  
kavaloo kuras tra verd valo,  
griz musho zumas en dens busho,  
leono sidas sur or trono,  
abelo ofras falva mielo,  
kastoro rodas hard arbورو،  
elefanto es bon giganto,  
papiliono es miniono,  
ronronas kato sur sik mato,  
exhalas floro bon odoro,  
oranjo vokas quika manjo,  
ma homo gustis reda pomo:  
serpento duktis lu a tento...

## **La viruso**

Kontre ca Liliputano,  
raskala kornoza grano,  
leda filio di putano,  
helpas nula talismano  
nek pilulo o tizano  
di vortoza sharlatano,  
nam ne haltas la tirano,  
mem se likas la butano,  
o se pafas serbatano,  
o se suflas uragano...

Fugas do irga kristano,  
desmetinte la sutano,  
quaze de kruel satano.  
Anke pia franciskano,  
e panikoz anglikano  
kun tre pala puritano,  
e kuras mahomedano,  
(qua es eminent sultano)  
embracante la korano

e trusante la kaftano,  
(dum ke falas la turbano)  
vers rapida karavano,  
quan ja vartas por permano  
plu longa kam tot semano,  
kun tre skarsa sika pano,  
senvirusa vast savano.

Lin imitas la pagano,  
irga judo e profano,  
la soldato, kapitano,  
la tenoro e soprano,  
la doktoro e cigano,  
tutelero ed orfano  
e mem (quala stranja klano!)  
verd o blu samideano...

Ne flugas l'aeroplano,  
ma trans e cis l'oceano,  
ye singla meridiano,  
en kliniko o kabano,  
di esforco yen emano,

(nul amuzo, nula flano,  
nula lekto di romano,  
nula pleo di piano!):  
mediko sorgas organo  
e sutas irga membrano,  
flegisto solvas esvano.

Novico o veterano,  
omn experto es humano  
ed amiko e kompano!

Jacas irga samsortano,  
(senpekunia bas-klasano  
o maxim richa bramano,  
babilem Italiano  
o tacem nordal Germano)  
sur kamilo o divano:  
omnu juas akompano!

E pos kurta tempo-spano  
ekpulsesos leviatano.  
Omnu tushos pasamano  
sen timar virus-arkano.

La fidela chambelano,  
juante saneso-gano,  
sorgos la bel porcelano.

Itere kreskos la kano  
e florifos la platano.  
En silvo l'orangutano  
savuros pulpoz banano.  
Rifalos do varma guano  
de fluganta pelikano.  
Retrovenos kormorano,  
matine kantos la hano,  
parados mem la fazano,  
e joyos irga terano!

Dek e ok yari pos *Dazlo*, aparinta en 2002 (e rieditita en 2017 e 2019), Gonçalo Neves lansas nun sua duesma Ido-poemaro, konsistanta ek dek e ok poemi pri diversa temi, precipue amoro e la Linguo Internaciona ipsa, quan l'autoro judikas kom instrumento nekareebla por expresar “omna nuanci e singla detalo” di sua anmo.

Ica kolekturo kontenas omna poemi quin l'autoro skriptis de pos 2002. Kin de li publisesis antee en Idolisto od en la jurnaloo *Posta Mundi*. Le cetera aparas hike unesma-foye.

